



V Vilhelmus ille in Heluetia apud Vranienses natus atque educatus fuit. Cum autem is insigni animi & corporis fortitudine esset præditus, breui apud suos magnam authoritatem adeptus est. Eodem tempore Romanum Imperium Henricus septimus Litzelburgensis magna gloria administrabat. Is Heluetiorum interioribus pagis Vraniensibus, Suitensibus, & Vnderuualdensibus priuilegia antecessorum renouauit, atq; multis alijs immunitatibus uirtutis ergò ornauit Constantiæ, anno post natum Christum millesimo trecentesimo nono. Præcipuè autem ipsis concessit, ut nulli principum nisi Cæsari obedirent, ad nullumq; iudicem, nisi præfectum à Cæsare ipsis ordinatum, uocarentur. Erant enim cum Austriæ principes in locis finitimis potentissimi, qui subinde ea loca subigere, atque suæ ditioni coniungere studebant. Cum autem Henricus Cæsar esset mortuus, atque per annum ferè interregnum esset in Imperio, nobiles finitimi Heluetios laceßebant, atq; uarijs iniurijs afficiebant, qui etiã clàm ab Austriacis ducibus adiuti, ut tandem optimi uiri bonis suis exhausti, sua sponte proximis principibus sese subijcerent, atque contra nobilium proteruiam eorum auxilium implorarent.